



SAMOA I SISIFO

Faatulagaina o Aiaiga

- | | |
|--|---|
| <ol style="list-style-type: none"> 1. Igoa 2. Igoa Puupuu 3. Pule ma Suetusi Sili | <ol style="list-style-type: none"> 3. Teuteuga e mulimuli mai ai |
|--|---|

1997, Nu.3

O SE TULAFONO e teuteu ai le Faavae o le Malo Tutoatasi o Samoa i Sisifo e aiaia ai mo ni tuutuuga fou i le tofiga o le Pule ma Suetusi Sili. *(14 Mati 1997)*

UA FAIA e le Fono Aoao Faitulafono o Samoa i Sisifo i totonu o le Palemene ua potopoto e faapea:-

1. Igoa puupuu - E mafai ona taua lenei Tulafono o le Tulafono o Teuteuga o le Faavae 1997 ma e tatau ona faitauina faatasi ma avea ai o se vaega o le Faavae o le Malo Tutoatasi o Samoa i Sisifo (e pei ona taua mulimuli ane iinei o le Faavae).

2. Pule ma Suetusi Sili - Ua teuteuina nei le Faavae i le soloia o le Mataupu 97 ma suia i le Mataupu e faapea:

"97. Pule ma Suetusi Sili-(1) O le a i ai se Pule ma Suetusi Sili o ia lea o le a tofia e le Ao o le Malo e faia i luga o le fautuaga a le Palemia.

(2) Vagana ai e ese mai ai i so o se aiaiga o lo o i totonu o lenei Mataupu, o le Pule ma Suetusi Sili o le a umia le tofi mo se vaitaimi e tolu tausaga peitai e mafai ona toe tofia.

(3) O le Pule ma Suetusi Sili e le mafai ona avea ma sui usufono o le Fono Aoao Faitulafono ma e le mafai ona ia umia so o se i si tofi mo se tau po o le auai i so o se galuega mo se tau e ese mai ai i tiute o lona tofi.

(4) E mafai e le Pule ma Suetusi Sili ona faamavae mai i lona tofi i so o se taimi i luga o se tusi e faia e ia ma faatuatusi i le Palemia.

(5) E mafai e le Ao o le Malo, i luga o le fautuaga a le Palemia ona faamalolo mo se vaitaimi le Pule ma Suetusi Sili mai lona tofi, ae le mafai ona aveeseina mai i le tofi vagana ai pe a faia e tusa ma aiaiga o le Mataupu lenei o le Faavae.

(6) O le a faataatia e le Palemia i luma o le Fono Aoao Faitulafono se faamatalaga atoa o le mafuaaga o le faamalolo mo se vaitaimi o le Pule ma Suetusi Sili mai lona tofi, i totonu o le fitu aso o lo o usua ai le fono a le Fono Aoao Faitulafono.

(7) O le Pule ma Suetusi Sili ua faamalolo mo se vaitaimi mai lona tofi, e toe faafoi i lona tofiga e le Ao o le Malo, vagana ai i totonu o le fasefulu-lua aso talu ona faataatia i le Fono Aoao Faitulafono le faamatalaga a le Palemia i le tauaofiaga lava lea, ua faia se iugafono a le Fono Aoao Faitulafono ua talosagaina ai lona aveeseina mai le tofi, ma a fai ae faia se iugafono faapea a le Fono Aoao Faitulafono, o le a aveeseina loa e le Ao o le Malo le Pule ma Suetusi Sili mai le tofi.

(8) O lenei Mataupu o le a faaaoga i le tagata o lo o umia le tofi o le Pule ma Suetusi Sili i le taimi e amata faamamaluina ai lenei Mataupu ma e avea ai faapei o lenei Mataupu sa amata faamamaluina i le taimi o lona tofia i lenei tofi ma sa tofia o ia e tusa ai ma aiaiga o lenei Mataupu, vagana ai e amata le faitauina o le taimi o le tofiga mai le aso na faamamaluina ai lenei Mataupu.

(9) A fai ua maea le vaitaimi sa tofia ai se tagata e avea ma Pule ma Suetusi Sili, o lea tagata, vagana ai ua ia tuua le tofi po o ua aveesea mai lea tofiga i lalo o aiaiga o lenei Mataupu, o le a faaauau pea i le tofi seia toe tofia o ia pe seia tofia sona sui.

3. Teuteuga e mulimuli mai ai - O le Tulafono o le Ofisa o le Suetusi 1961 ua teuteuina mulimuli nei i le soloia o Fuaiupu 5,6, ma le 7.

**Lolomiina i lalo o le pule a le Fono Aoa'o Faitulafono,
e le Failautusi o le Fono Aoa'o Faitulafono.**